



*Iacob oyant nouvelles que Ioseph est viuant, & Gouverneur d'Egypte, s'appreste pour y descendre avec ses familles & troupeaux.*

**L**ES enfans d'Israël fort ioyeux d'auoir reconneu Ioseph leur frere, & d'estre en sa bonne grace : ayans aussi en sa faueur obtenu du Roy les honneurs, presens, & chariots conuenables pour leur voyage en la terre de Chanaan, & de là retourner en Egypte ; ils firent telle diligence, qu'en peu de iours arriuerent vers leur pere Iacob (lequel estoit en grande destresse pour leur trop longue absence) auquel ils reciterent comment Ioseph estoit vif ; & outre ce, qu'il estoit comme pere du Roy, & dominateur sur toute la terre d'Egypte. Ce qu'oyant Iacob, deuint comme vn qui s'éveille d'un pesant sommeil, & n'adjoüsta foy à leurs paroles : mais quand ils luy eurent déclaré l'ordre du faict de poinct en poinct, & voyant les chariots & tout ce que Ioseph luy enuoyoit, l'esprit luy reuint, & dist : Il me suffit que Ioseph est viuant, j'iray, & le verray auant que ie meure. Peu apres Iacob fit preparer ses enfans, & les enfans de ses enfans, qui estoient en nombre de septante personnes, avec ses troupeaux, & tout ce qu'il auoit en Chanaan, pour descendre en Egypte. Et vint sacrifier au Puy du Iurement, où le Seigneur s'apparut à luy par vision, l'as-séurant qu'il seroit son conducteur en Egypte, & croütroit de luy grande lignée, & que de ce lieu il l'en feroit remonter, & que Ioseph assisteroit à sa mort.